

Ek vertrou dat jy die afgelope twee weke in jou binneste besig was om van jousef minder te maak en van God se Gees meer te maak na aanleiding van die afgelope twee onderwerpe nl.: **afhanklikheid en toewyding**. Hierdie week se tema is nie 'n baie aangename tema nie. Dit is nie lekker om dit te hoor nie. Inteendeel – dis moeilik om dit te hoor. **SONDE!** Dit klink dalk al soos 'n perd wat holrug gery is, maar die gevaarlikste sonde is om van geen sonde bewus te wees nie.

SLEUTEL 3 – BREEK RADIKAAL MET DIE SONDE

Matteus 5:27-30

²⁷“Julle het gehoor dat daar gesê is: ‘Jy mag nie egbreuk pleeg nie.’ ²⁸Maar Ek sê vir julle: Elkeen wat na 'n vrou kyk en haar begeer, het reeds in sy hart met haar egbreuk gepleeg.

²⁹“As jou regteroog jou laat struikel, haal hom uit en gooi hom van jou af weg; want dit is vir jou beter dat net een van jou ledemate verlore gaan as dat jou hele liggaam in die hel gegooi word. ³⁰Of as jou regterhand jou laat struikel, kap hom af en gooi hom van jou af weg; want dit is vir jou beter dat net een van jou ledemate verlore gaan as dat jou hele liggaam in die hel beland.”

Nadat jy hierdie teks gelees het, hoef ons sekerlik nie te redeneer oor die betekenis van die woord “radikaal” in die tema van hierdie week nie nê? Om jou oog uit te haal as hy die gevolg daarvan is dat jy struikel – is RADIKAAL! So tipies Jesus nê. Dis wonderlik, dis hoekom ons Hom volg. Jesus draai nie doekies om nie – “verwyder drasties die dinge in jou lewe wat jou na die sonde lei”. Dit vra ook dat ons die areas of terreine in ons lewens waarbinne ons geneig is tot sonde, doelbewus sal vermy. Is dit opsioneel? Verseker nie! Die sonde is 100% in stryd met wat die Gees van God in en deur ons wil doen (Gal. 5:17). Dit is soos twee magneetvelde wat mekaar verstoot. Dit is óf die een óf die ander. Ons kan selfs sê: “Dit is die Een of die ander”.

Hoekom is dit belangrik om so drasties teenoor die sonde op te tree? Die teks (Jesus se woorde op die lippe van die teks) is baie duidelik hieroor: die sonde lei ons na die hel. Die Griekse woord vir “hel” is **gehenna**. Dit was die naam van die vallei aan die Suidekant van Jerusalem, buite die stad. Dit was die plek waar al die misdadigers wat die doodvonnis ontvang het se lyke gegooi



Foto 1: Die vallei aan die Suide kant van Jerusalem

is. Dit laat my sommer dadelik dink aan die Vallei van Doodsbeendere in Esegïel. Kan jy jou die doodsgewoel van daardie plek voorstel. Daar is geen hoop, geen lewe, geen toekoms meer nie. Net die geraamtes van dit wat eens was. Die sonde se resultaat is ook 'n absolute doodsheid – geestelik, emosioneel, intellektueel en selfs fisies. Jesus is onversetlik in Sy oproep tot 'n rein lewe. Hy pleit by ons om drasties met die sonde te breek, want Hy was eens in die *gehenna* toe Hy ter helle neergedaal het en wil ten koste van Homself dit nie vir my en jou toewens nie. Hy wil vir ons die lewe in oorvloed gee deur Sy Gees. Dit vra dat ons alle vorme/moontlikhede/neigings tot die sonde sal uitsny/afkap/wegjaag. Selfs die klein dingetjies, wat ons as gering ag, wat lei tot die sonde, moet weg!

'n Senior duiwel het eendag vir een van die junior duiwel-studente die volgende les geleer oor hoe om mense te leer om sonde te doen: “Dit is nie nodig om 'n mens 'n moord te laat pleeg as leuens dieselfde doel dien nie.” (uit CS Lewis se *The Screwtape letters*)

Daar kan baie lank geredeneer word oor die praktiese uitdaging en uitvoering rakende hierdie opdrag. Ek is van mening dat een belangrike aspek hiervan die volgende is: Jean-Pierre Camus het eendag gesê: “Mens kom verder deur lief te wees vir die goeie as om bang te wees vir die sonde”. Ek kan so hard probeer om die sonde in my lewe stuk vir stuk uit te sny. Waarmee hou ek my egter dan besig? Met *die sonde!* Die ander opsie is dat ek my meer doelbewus besighou met die goeie. Wanneer ek dit doen en regkry raak Gal. 5:17 baie duidelik. Dan bou ek aan die tempel waarbinne die Gees in my werk en breek af aan die verwoestende oorlogstorings van die sonde!

My gebed is dat die Here ons sal instem op die frekwensie van Sy wil.

My gebed is dat ons aandagtig sal luister na dit wat ons by Hom hoor.

My gebed is dat ons die belewenis sal hê dat die stemme op die ander frekwensies van ons bestaan al hoe sagter en sagter en stil sal raak.